

Այնտեղ բացում է մի ոսկեայ դուռ եւ մարդուն ներս է տանում բիւրեղեայ հրաշալի ապարանքի մէջ: Այնտեղ մարջանի (բուստի) մշտադալար ծառերի ներքոյ ճեմում են յաւերժական հիւրիներ, փերիներ, աւելի պայծառ, քան Նոր ծագող արեգակը իր վարդակարմիր ճառագայթներով: Այնտեղ «հազարան բլբուլը» կերակրում է մարգարիտներով եւ, փղոսկրեայ վանդակի մէջ, ամեն մի ըրպէում վախում հազարաւոր եղանակներ, հազարաւոր Նոագներով: Նրա երգի ձայնից անուշահոտ վարդենիները գտնուում են մշտական զմայլմունքի մէջ: Այնտեղ արարածները չեն ծերանում, այլ վայելում են յաւերժական սեր եւ մանկութիւն: Բայց բիւրեղեայ ապարանքի ոսկեայ դուռը ամենի առջեւ չէ բացում, որովհետեւ նա կախարդոած է եւ խորհրդաւոր թիլիսման ունի: Մի ծերունի դերվիշ, որ աչքով տեսել է այդ բոլորը, խոստացել է տալ ինձ այդ թիլիսմանը»:

Ասլանը ժպտաց թուրք հնագետի միամտութեան վրայ: Նրա ցոյց տուած հորը ուրիշ ոչինչ չէր, եթէ ոչ այն հին, ստորերկրեայ անցքերից մէկը, որ մի ժամանակ ծառայել է կամ որպէս փախուստի ճանապարհ, կամ հաղորդակցութիւն է ունեցել ուրիշ ամրութիւնների հետ, որոնք շատ հեռու չեն բերդից: Այս տեսակ հորեր շատ էին երեւում: Կարծես քարափի մթին խորքերում մի հսկայական մրջնանոց լիներ իր բազմաթիւ խորշերով եւ իր բազմաթիւ խոռոչներով, ուր մարդիկ երբեմն գործել են: Բայց իմ ուշադրութիւնը գրաւեցին երեսանից աւելի մեծ եւ փոքր այրեր ու ընդարձակ քարանձաւներ, որոնք Նոյնպէս փորոած էին քարափի մէջ, որոնց մի քանիսի մէջ մենք կարողացանք ներս մտնել: Նրանց վրայ երեւում էր ժամանակի արհեստն ու ճարտարութիւնը, եւ շատերը նրանցից զարդարած էին սեպածեւ արձանագրութիւններով:

– Աւանդութիւնը, – ասաց Ասլանը, – այս բերդը եւ այս այրերը Շամիրամին են ընծայում, որպէս թէ նինտեացի թագուհու գանձատունը, մթերանոցները, պահեստի տեղերը եւ բաղանիքները լինէին: Իսկ այդ բոլորը աւելի հին է, քան թէ Շամիրամը, թէեւ մեր ծերունի խորենացին հնագիտական միամտութեամբ Նոյնպէս նրան է ընծայում:

– Ի՞նչ է ասում խորենացին, – հարցրի ես խորին հետաքրքրութեամբ:

Կարծես Ասլանը խորենացու գիրքը այնպէս սերտած լիներ, որպէս ես Սաղմոսը. նա անգիր կարդաց պատմութիւնից այն տեղը, որ այդ բերդին էր վերաբերում, յետոյ աշխարհաբար թարգմանեց ինձ.

– «Իսկ անձաւի արեւահայեաց կողմը, այնպիսի նիւթի կարծրութեան մէջ, ուր մէկը այժմ եւ ոչ մի գիծ երկաթով փորել կարող է (Շամիրամը), պէսպէս տաճարներ, օթեւանների սենեակներ, գանձերի տներ եւ երկար այրեր